

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 2629 del 24/09/2025

En colaborazion con EUSALP, trei dis dediché ai lurieres leé al ecosistem del bosch e a la filiera del legn

“Discover Mountain Jobs”, per cognoscer i lurieres da mont

[Ladino] Dai 18 ai 20 de setember del 2025, dejeset joegn i à tout pèrt a la edizion 2025 del “Discover Mountain Jobs – Foresta e Legno”, endrezèda tel Trentin, anter Valsugana e Val de Fiem, dal Grop de Azione 3 de la Strategia europeèna per la region alpina (EUSALP), che l vegn coordinà da la Provinzia autonoma de Trent tras l Servije Mendranzes linguistiches e relaziions esternes.

L Grop de Azione 3 l se cruzia de marcià del lurier, educazion e formazion e, anter la autra robes, l endreza ativitèdes outes a portèr dant oportunitèdes de lurier te arees da mont, per poder tegnir e tirèr talenc e scombater contra l arbandon de la valèdes da mont. Te chest chèder se svilupea la scomenzadiva “Discover Mountain Jobs” (cognoscer i lurieres da mont), che chest an la é stata dedichèda ai lurieres leé al ecosistem del bosch e a la filiera del legn, de gra a la colaborazion co la Task Force EUSALP “Foreste multifunzionali e uso sostenibile dei materiali legnosi”.

En jebia ai 18 de setember i joegn partezipanc i é stac touc dant tel lech da marevea de Arte Sella, olache i à scontrà raprezentanc del mond de la enrescida e del Servije di bos. Gian Antonio Battistel, del “Centro di Ricerca e Innovazione della Fondazione Edmund Mach”, l à sottrissà l'emportanza di projec europeegn de enrescida aplichèda te chest setor. Valentino Gottardi (Servije Bos PAT) l à despiegà la particolaritèdes del grop forestal provinzièl e la desvaliva ativitèdes che l met a jir sul teritorie per stravardèr ambient e i sentadins.

L secont dì, en vender ai 19 de setember, l é scomenzà co la vijita al CFP ENAIP de Tieser – setor del legn mobilia e taèr fora l legnam, coordinà da la profesora Giada Mearns. La scontrèda con insegnanc, studenc e ex-studenc, encomai profescionis del setor, l'à fat vegnir fora l'emportanza de la colaborazion de duc i sogec del teritorie per creèr e mantegnir na filiera de valor e sèna, che la va da la gestion drete del bosch a la sacotantes oportunitèdes profescionèles leèdes al lurèr l legn. La vijita a la Sia de la Magnifica Comunità di Fiemme e la firma Enrico Ciresa S.r.l. les à avert na fenestra su dotrei de chesta oportunitèdes. I tousc e la touses i à entenù soraldut l gran gust che l imprenditor Fabio Ognibeni l à tel vidèr na realtà aziendèla particulèra, desche chela di tulins de risonanza per i strumenc a archet e i pianoforc, e l voler se renovèr aldò de na esperienza binèda te egn e egn de lurier. Ence la curta scontrèda con Alessandro Arici de Radio Fiemme la é stata rejon de ispirazion, con n encorajament a pontèr via da si ensomesc per svilupèr projec e i mudèr, con pazienza e dedizion, te realtà.

En sabeda ai 20 de setember i tousc e la touses che à tout pèrt al projet i é jic a veder l magasin de VAIA, col vegnir a cognoscer coscita co dal tormen del 2018 l é nasciù na startup che la é doventèda na realtà aziendèla che la fèsc de l'economia zircolèra sie core business. I efec del tormen Vaia sul teritorie i é stac touc ca da nef da Paolo Sandri, president de la categoria de firmes da boschier de la “Associazione Artigiani Trentino”, che l à contà del besegn de endrezèr da nef sia firma e, più en generèl, l setor de la firmes da

boschier per responder a la gran catità de legnam che fora de n bel nia se à bina da la piantes rebaltèdes. Sia testimonianza l'ha sottrissà l'emportanza de fèr rei con realtèdes davejin e dalonc per responder a situaziuns de emergenza e, tel medemo temp, tor su la oportunitèdes.

L'emportanza de sostegnir i joegn e i fèr arvejinèr a la oportunitèdes profescionèles te la arees da mont per arseguir l'davegnir de chisc teritories la é stata sottrissèda dai aministradores del post che i à tout dant i tousc e la touses a Roncegno Terme, l'vizeombolt Mirko Montibeller e l'assessor Giuliana Gilli, e a Tieser, l'ombolt Massimiliano Deflorian.

L'Discover Mountain Jobs 2025- Foresta e Legno l'è stat endrezà tel chèder del Projet Support EUSALP, co-finanzià dal Program Interreg Spazio Alpino.

Maor informaziuns sul Grop de Azione 3 de EUSALP sun [chest link](#).

Traduzion di Servijes Linguistics e Culturèi del Comun general de Fascia

(cdt)